## Bájkkeavijssa NuorttaSállto



AWG-nammadusán lij maŋemus tjuojggamtjåhkanibme Yllasin Suoman basádismáno maŋegietjen ja dan maŋŋela válljijin juohkusav tjuojggijs gudi galggi Sámev åvdåstit dán dálve arktalasj dálvvegilpustallamijn. Naima Nergård (14) Divtasvuonas le oasse dát juohkusis. Ålles ásadusán oassálassti birrusij 2000 ulmutja arktalasj guovlos ja Nuortta rijkajs. Naima le åvddåla Sámev åvdåstam. Vuostasj bále lij jagen 2008, dalloj lij Yellowknifan.

## Tjuojggamav berustahttjáj Svierigin

14-jagák Ájluovtan bajássjattaj, desik gudá jage dát rájes Norrbottenij Svierigij jåhttåj. Danna ielvij stuorra tjuojggambirrasav. Ájluovtan lij ienemusát bállotjiektjam ja Naima ittjij álgos vuojga tjuojggamav berusta gå Svierigij bådij.

- Ittjiv vuojga tjuojggamav berusta, valla áhttje muv maŋen giesij tjuojgatjit ja de oadtjuv rádnav gudi sidáj muv maŋen tjuojggamav gæhttjalit. Maŋenagi suohttasabbo sjattaj, sierraláhkáj gå máhtijma hárjjidallat nubbe nuppe vuosstij ja sprintgilpustallamijn oassálasstet. Ájnas le ienep ulmutja oassálassti vaj birás sjaddá, javllá sån. Naima ittjij njuolgga válljiduvá nuoraj arktalasj dálvvegilpustallamijda, valla vierttij moadda gæhttjalimijt tjadádit, duola dagu bievllatjåhkanimen Ålmåjvákken Gájvuonan gålgådismánon ja tjuojggamtjåhkanimen Yllasin

Suoman. Sån alvaduváj ja ávvusij gå oattjoj diedov sån lij dajs vuorbálattjajs gudi bessi Canadaj mannat guovte máno birán.

 - Mån nav ávvusiv, gahppiv ja tjelluv gå diedov oadtjuv, javllá Naima telefåvnå baktu Svierigis.

Suv stuorra åvddågåvve le Svieriga tjuojgge Charlotte Kalla.

- Muv stuorra sávadus le sjaddat sæmmi tjiehppe gå sån. Miján le ham gájkan dat stuorra sávadus stuorámus gilpustallamijt vuojttet, javllá sån.

Sån duodas tjuojggam le hálvva låsså valástallam gånnå viertti muhttijn ietjas nággit. Iehtjádijda gudi bierrijin tjuojggagoahtet javllá:

- Le suohtas, ja ij máhte ganugit. Uddni sån skåvlåv vádtsá Norrbottenin, valla ájádallá joarkket tjuojggamgymnasan Jielleváren gå vuodoskåvlåjn gærggá. Duodden julevsámegiellaj, vuona- ja svenskadárogiellaj låhkå sån iennilsgielav ja fránskagielav skåvlån. Mannemus gielav bæssá ávkástallat gå Canadaj manná.

- Gå Canadan lidjiv guokta jage dát rájes de lidjin muhtema gudi fránskagielav sáhkadin. Åsijt gal dádjadiv. Masi ienemusát ávvudalá, gilpustallamijda jali sosiálalasj oassáj birra?

 - Ávvudaláv diedon gilpustallamijda, valla aj dajt nuppijt oassálasstij tjuovvot ja gæhttjat gåktu da nagádi.
Juogostjuojggijt tjuovvop ja oahppap sijájs. Moadda smidás tjuojgge arvusmahtti, javllá sån.
Duodden 23 sáme tjuojggijda galggá aj bállotjiektjamjuogos aktse tjiektjij oassálasstet.



Snjuktjamánon 2010, le 21. bále Arctic Winter Games (AWG) ásaduvvá. Yellowknifean jagen 2008 oassálasstin aktse guovlo daj rijkajgasskasasj gilpustallamijn. Sáme oassálasste oassálasstin tjuojggamin ja jagen 2008 aj bállotjiektjamjuogos næjtsoj gudi sjaddin arktalasj vuojtte. Arctic Winter Games ásaduvvá nuorajda ja tjadáduvvá fært nuppát jage. Snjuktjamánon boahtte jage tjähkani vargga 2000 nuora guovlojs 55. gåbddågrádas nuortas. Grand-Prairie le oarjemus stáda mij le dájt gilpustallamijt ásadam.

